

Vumm Droome

Also monschmol, wenn isch in de Nacht wach werr, waaß isch noch, was isch grad gedroomd habb, awwer nitt immer. Monschmol waaß isch noch nitt emol, dass isch iwverhaupt gedroomd habb. Isch droom joo aach nitt jedes Mol irschend ebbes was-ses werklisch gewwe dut, sonnern ab unn zu irschend ebbes Fantastisches, unn wenn isch doodruffhie wach werr unn misch droo erinnern kann, schiddel isch moin Kobb im Kisse, dreh misch uff die Seit unn versuch widder oizeschloofe.

Vor e paar Nächt habb isch vunn Flerschem gedroomd unn doodefoo, wie sisch un-ser Stadt uff die Verännerunge im Klima vorbereite dut. Weil was merr in Zukunft mieh unn mieh brauche, iss e besser Klima zwische de Heiser unn Strom unn Trinkwasser. Wasser hädde merr joo im Moo genuch, awwer ferr dess Klima unn de Strom muss ebbes gemachd werrn. Unn doo habb isch gedroomd, dass neie Heiser in Flerschem runderum mett Griezeich bewachse unn die Dächer mett Solarzelle beleschd soi misse. Aach dass e Oolaach gebaut werrd, die außem Moowasser e gut Trinkwasser mache dut.

Wie omm Daach druff moin Kummbeer Schorsch oogerufe hott, habb isch dem dess vunn dem Droom vezählt unn doo hodder ins Telefon gelachd. Honnes, hodder donn gesaad, unn isch habb vunnere Windmiehl gedroomd, die zwische Wicker unn Weilbach in de Näh vunn de Audobohn gebaut werrd. Dess iss beim Droome alles su ... su, no ja, realistisch gewese, dess meddem Bedongfundament, dene dicke iwver hunderd Meder hohe Rohrn, dere Gondel ferr de Generator owwe druff unn dene drei longe Flitsch, unn donn noch vunn dem Grawe ferr die Stromleitung nooch Flerschem, dass isch beim Wachwerrn gons sicher gewese bin, dess alles wär genau su bassierd. Donn habb isch awwer noch ebbes geseh unn dess hott misch werklisch iwverraschd.

No, Schorsch, habb isch gefroochd, was issen dess gewese, wassde beim Droome genau geseh host unn disch iwverraschd hott?

Doo seeder: Ei dass vill Leit vunn Wicker unn vunn Weilbach vor dere Windmiehl gestonne hawwe unn dass die allminonner, wie sisch die Flitsch dess ersde Mol gedrehd hawwe, wie doll geklatschd hawwe.

Eiern Honnes